

Na osnovu člana 16. stav 4. Zakona o Vladi Zeničko-dobojskog kantona-Prečišćen tekst („Službene novine Zeničko-dobojskog kantona“, broj 7/10), na prijedlog Ministarstva za poljoprivredu, šumarstvo i vodoprivredu, Vlada Zeničko-dobojskog kantona, na 48. sjednici, održanoj 20.01.2012. godine, d o n o s i

ZAKLJUČAK

I

Usvaja se Informacija o nepostojanju zakonske regulative u oblasti šumarstva i posljedicama takvog stanja u navedenoj oblasti, Kantonalne uprave za šumarstvo Zeničko-dobojskog kantona.

II

Zadužuju se Sekretar Sekretarijata za zakonodavstvo, Sekretar Vlade Zeničko-dobojskog kantona i resorno kantonalno ministarstvo da, u ime Vlade Zeničko-dobojskog kantona, zatraže od Vlade Federacije Bosne i Hercegovine davanje uputa i instrukcija na koji način će do donošenja Zakona o šumama postupati kantonalni organi uprave nadležni za poslove šumarstva i kantonalna šumsko-privredna društva u cilju izvršavanja poslova i zadataka za koje su ustanovljeni.

III

Zaključak stupa na snagu danom donošenja.

Broj: 02-_____/12.

Datum, 20.01.2012. godine

Z e n i c a

PREMIJER

mr.sci.Fikret Plevljak dipl.ing.

DOSTAVLJENO:

1x Ministarstvo za poljoprivredu, šumarstvo i vodoprivredu,

1x Kantonalna uprava za šumarstvo,

1x Sekretar Sekretarijata za zakonodavstvo,

1x Sekretar Vlade,

1x a/a.

INFORMACIJA

o ne postojanju zakonske regulative u oblasti šumarstva i posljedicama takvog stanja u navedenoj oblasti

Cilj ove Informacije je upoznavanje Vlade Zeničko-dobojskog kantona o nepostojanju zakonske regulative u oblasti šumarstva i posljedicama koje iz takvog stanja proizilaze usljed nemogućnosti izvršavanja osnovnih poslova iz navedene oblasti.

Zakon o šumama („Službene novine Federacije BiH“, broj: 20/02, 29/03 i 37/04) se prestao primjenjivati u septembru 2009.godine, nakon čega je Vlada Federacije Bosne i Hercegovine donijela Uredbu o šumama („Službene novine Federacije BiH“, broj: 83/09, 26/10, 33/10 i 38/10) koja je uređivala oblast šumarstva do decembra 2011.godine. Presudom Ustavnog suda Federacije Bosne i Hercegovine („Službene novine Federacije BiH“, broj: 34/11) utvrđeno je da Vlada Federacije Bosne i Hercegovine nije imala ustavni i zakonski osnov da pomenutom Uredbom o šumama uređuje oblast šumarstva, te je kao prijelazno rješenje dat rok od šest mjeseci da se zakonom uredi materija koja je regulirana osporenim uredbom.

Kako je utvrđeni rok od šest mjeseci za primjenu navedene uredbe istekao u decembru 2011.godine, a obzirom da i poslije tog datuma oblast šumarstva nije uređena u smislu zakonske regulative dovedeno je u pitanje izvršavanje osnovnih nadležnosti federalnih i kantonalnih organa uprave ustanovljenih u cilju izvršavanja propisa iz ove oblasti.

Posljedice ne postojanja zakonske regulative iz oblasti šumarstva u najvećoj mjeri snose kantoni i njihovi organi uprave nadležni za provođenje propisa iz ove oblasti, imajući u vidu činjenicu da su ranije važećim Zakonom o šumama („Službene novine Federacije BiH“, broj: 20/02, 29/03 i 37/04) kao i navedenom Uredbom o šumama najznačajniji poslovi iz ove oblasti povjereni na izvršavanje upravo kantonima.

Neuređenim stanjem u ovoj oblasti dovedeno je u pitanje izvršavanje svih poslova i zadataka iz oblasti šumarstva koji su dati u nadležnost kantona – resornih ministarstava, kantonalnih uprava za šumarstvo i šumsko-privrednih društava. Navedeni organi uprave i preduzeća nadležna za poslove šumarstva nakon prestanka primjene Uredbe o šumama od strane Vlade Federacije Bosne i Hercegovine nisu dobili nikakva uputstva i instrukcije na koji način postupati u izvršavanju svih poslova koji su za osnov imali ranije važeću uredbu.

Za kantonalne organe uprave nadležne za izvršavanje propisa iz oblasti šumarstva poseban problem predstavlja nemogućnost pokretanja postupaka u cilju zaštite i čuvanja šuma i šumskih zemljišta (podnošenje prekršajnih prijava za bespravne sječe u količini do 2,00 m³, nelegalan promet drvne mase i druga činjenja koja su ranije važećom uredbom bila kvalifikovana kao prekršaj), zatim nemogućnost provođenja upravnih postupaka po zahtjevima za sječu stabala u privatnim šumama i drugih poslova, što je dovelo do onemogućavanja građanima da na zakonit način ostvaruju svoja prava. Rješavanje u postupcima za uspostavu prava služnosti, promjenu namjene šumskih zemljišta, krčenja šuma i drugi poslovi, što za posljedicu ima onemogućavanje pravnim licima (Elektroprivreda, BH Telecom, općine i dr.) realizacije njihovih projekata i izvršavanja drugih poslova.

Ne postojanje propisa iz ove oblasti također dovodi u pitanje prikupljanje i utrošak namjenskih sredstava, nadzor nad izvođenjem radova u šumarstvu, tehnički prijem tih radova, kao i mnogi

drugi poslovi koji su svoju pravnu osnovanost crpili iz ranije važećih propisa iz oblasti šumarstva.

Navedeni problemi imaju još jaču težinu zbog samog značaja šuma i šumskih zemljišta, koje su ranije važećim zakonom proglašene kao dobro od općeg interesa, što predstavlja i razlog više da se ova materija reguliše ubrzanim donošenjem zakona.

Vlada Zeničko-dobojskog kantona je dala podršku inicijativi za donošenje Zakona o šumama, organizirajući i raspravu povodom davanja primjedbi i sugestija na ponuđeni tekst Nacrta Zakona o šumama.

Federalno ministarstvo poljoprivrede, vodoprivrede i šumarstva je svim kantonalnim ministarstvima nadležnim za poslove šumarstva dostavilo obavijest navodeći u istom da će ovo ministarstvo zbog ne postojanja propisa za oblast šumarstva sve zahtjeve vezane za ovu oblast, zaprimljene nakon 06.12.2011.godine vratiti na adresu organa koji je iste i dostavio.

Predstavnički dom Parlamenta Federacije Bosne i Hercegovine je donio zaključak kojim preporučuje vladama kantona da do donošenja novog Zakona o šumama povedu posebnu pažnju kada je u pitanju sječa šume od strane kantonalnih gazdinstava.

Međutim, navedeni akti, organima nadležnim za poslove šumarstva ne daju nikakva uputstva i instrukcije na koji način postupati u izvršavanju svih poslova iz ove oblasti.

Uzimajući u obzir sve navedeno, očekujemo da će Vlada Zeničko-dobojskog kantona tražiti od Vlade Federacije Bosne i Hercegovine uputstva i instrukcije na koji način i po kojem osnovu će do donošenja zakona, kantonalni organ uprave nadležan za poslove šumarstva i kantonalna šumsko-privredna društva izvršavati poslove i zadatke zbog kojih su i ustanovljeni.

Obrađivač:

Oparić Mirsad

MINISTAR

Samir Selimović